

ADMINISTRACIÓN LOCAL

MUNICIPAL

CEE

Aprobación definitiva da modificación do regulamento de títulos, honras e distincións do Concello de Cee

ANUNCIO

EXPEDIENTE Nº 2025/G014/000001

O Pleno do Concello de Cee na sesión extraordinaria realizada o día 4 de abril de 2025, acordou a aprobación inicial (modificación) do REGULAMENTO DE TÍTULOS, HONRAS E DISTINCIÓNS DO CONCELLO DE CEE

O acordo da aprobación inicial e o expediente de modificación do Regulamento someteuse a información pública e audiencia dos interesados, con publicación no Boletín Oficial da Provincia e no taboleiro de anuncios do Concello, polo prazo de trinta días para que as persoas interesadas puidesen examinar o expediente e presentar reclamacións ou suxestións.

Rematado o período de información pública e ao non presentarse reclamacións ou suxestións no prazo mencionado, considérase aprobada definitivamente a modificación do Regulamento de títulos, honras e distincións do Concello de Cee, sen necesidade de acordo expreso polo Pleno.

Publícase, a continuación, o texto íntegro definitivo do Regulamento, para os efectos da súa entrada en vigor.

“REGULAMENTO DE TÍTULOS, HONRAS E DISTINCIÓNS DO CONCELLO DE CEE

INTRODUCCIÓN.

A Constitución Española de 1978 reconece ós municipios, ás provincias e ás comunidades autónomas, autonomía para a xestión dos seus respectivos intereses. É o artigo 140 o que consagra o principio de autonomía local, polo que o goberno e a administración corresponden a cada un dos concellos.

O Regulamento de organización, funcionamento e réxime xurídico das entidades locais, aprobado polo Real decreto 2568/1986 do 28 de novembro, dedica parte do título VI, artigos 186 a 190, a regular as honras e distincións das entidades locais. Así, o artigo 189 sinala que as corporacións locais poderán acordar a creación de medallas, emblemas, distincións ou outros distintivos honoríficos, co fin de premiar especiais merecementos, beneficios sinalados ou servizos extraordinarios, así como acordar nomeamentos de fillos/as predilectos/as e adoptivos/as e de membros honorarios da Corporación, atendidos os méritos, calidades e circunstancias singulares que concorran nas persoas galardoadas.

Por todo isto, é manifesta a necesidade do Concello de Cee, en virtude da súa potestade de autoorganización, de aprobar un Regulamento para a concesión de distincións.

CAPÍTULO I. DISPOSICIÓNS XERAIS

Artigo 1. Obxecto e clasificación

1. Os títulos, honras e distincións que poderá conferir o Concello de Cee, incluso con carácter póstumo, para premiar especiais merecementos ou servizos extraordinarios, serán as seguintes:

- a) Medalla do Concello de Cee.
- b) Título de Fillo/a predilecto/a e fillo/a adoptivo/a.
- c) Título de Cidadán/á distinguido/a.
- d) Título de Ilustre visitante.
- e) Cronista oficial de Cee.
- f) Alcaldesa – Perpetua do Concello de Cee

2. Poderanse distinguir de forma honorífica a persoas, institucións ou entidades dando o seu nome a vías municipais, establecementos, centros ou instalacións do Concello de Cee.

A distinción tamén se poderá materializar mediante a instalación dunha placa.

3. A concesión de títulos, honras e distincións reconecerán méritos extraordinarios que concorran en personalidades, entidades ou corporacións, por ter prestado servizos ao municipio, dispensado honras ou producido beneficios sociais, culturais, turísticos, cidadáns, artísticos, musicais, deportivos, empresariais, científicos ou similares.

Artigo 2. Carácter dos títulos, honras e distincións

1. Os anteriores títulos, honras e distincións teñen carácter exclusivamente honorífico polo que non xerarán dereito administrativo, nin conlevarán o dereito a ningunha indemnización nin terán efecto económico.

2. As persoas titulares das distincións de medalla do Concello de Cee, fillo/a predilecto/a, fillo/a adoptiva e de cronista oficial de Cee disporán dun lugar reservado nos actos oficiais aos que sexan convocados polo Concello de Cee.

Artigo 3. Revogación

1. Os títulos, honras e distincións poderán ser revogados se os/as titulares realizan actos ou manifestacións contrarias aos motivos que xustificaron a súa concesión ou que de existiren no momento do outorgamento non o permitirían.

2. A revogación será acordada polo mesmo órgano que concedeu a honra, coa mesma maioría prevista para o nomeamento, logo da tramitación do correspondente expediente e de dar audiencia á persoa interesada ou ás que a sucedan.

3. Non poderán concederse os títulos, honras, nin distincións aquí reguladas aos membros da Corporación municipal en tanto exerzan os seus cargos.

CAPÍTULO II. CLASIFICACIÓN E REQUISITOS DAS DISTINCIÓNS.

Artigo 4. Medalla do Concello de Cee

1. A concesión da medalla do Concello de Cee outorgarase a aquelas persoas físicas ou entidades públicas ou privadas que destaquen polos seus merecementos e a súa traxectoria no sector turístico, cultural, veciñal, artístico, musical, deportivo, empresarial, social, científico ou similares.

2. A aprobación da concesión desta distinción requirirá acordo plenario adoptado pola maioría absoluta do número legal de membros da Corporación.

3. Esta distinción correspóndese coa imposición dunha medalla co escudo do Concello de Cee e coa entrega dun diploma artístico co escudo de Cee, con breve mención dos merecementos e entregárase nun acto solemne, procurando que coincida coa data do Día de Galicia.

Artigo 5. Título de fillo ou filla predilectos.

1. O título de fillo ou filla predilecto/a de Cee distingue persoas, nadas en Cee que destacasen polos seus méritos ou calidades persoais, especialmente nos ámbitos cultural, científico, social, artístico, deportivo, político ou económico, ou por servizos prestados en beneficio do concello.

2. A aprobación da concesión desta distinción requirirá acordo plenario adoptado pola maioría absoluta do número legal de membros da Corporación.

3. Esta distinción correspóndese coa entrega dun pin de solapa co escudo do Concello de Cee e un diploma artístico co escudo de Cee no que constará unha breve mención dos merecementos.

Artigo 6. Título de fillo ou filla adoptiva.

1. O título de fillo ou filla adoptivo/a de Cee poderá outorgarse as persoas que, sen naceren no municipio, manteñan vínculos persoais con ela e que destacasen polos seus méritos ou calidades persoais, especialmente nos ámbitos cultural, científico, social, artístico, deportivo, político ou económico, ou por servizos prestados en beneficio do concello.

2. A aprobación da concesión desta distinción requirirá acordo plenario adoptado pola maioría absoluta do número legal de membros da Corporación.

3. Esta distinción correspóndese coa entrega dun pin de solapa co escudo do Concello de Cee e un diploma artístico co escudo de Cee no que constará unha breve mención dos merecementos.

Artigo 7. Título de cidadán ou cidadá distinguido/a

1. O título de cidadán/á distinguido/a poderase outorgar a aquelas persoas físicas ou entidades públicas ou privadas do Concello de Cee nos que concorran un mérito ou méritos verdadeiramente singulares, no eido turístico, cultural, veciñal, artístico, musical, deportivo, empresarial, social, científico ou similares.

2. A concesión desta distinción realizarase mediante decreto de Alcaldía, sen necesidade de expediente previo.

3. Esta distinción correspóndese coa entrega dun pin de solapa co escudo do Concello de Cee e un diploma artístico co escudo de Cee no que constará unha breve mención dos merecementos.

Artigo 8. Título de ilustre visitante.

1. O título de ilustre visitante de Cee poderá concederse a aqueles persoeiros de especial relevancia que visiten o municipio de Cee e sexan recibidos oficialmente polo Concello.

2. O outorgamento desta distinción realizarase mediante decreto de Alcaldía, sen necesidade de expediente previo.

3. Esta distinción correspóndese coa entrega dun pin de solapa co escudo do Concello de Cee e un diploma artístico co escudo de Cee no que constará unha breve mención dos merecementos.

Artigo 9. Cronista oficial de Cee

1. O título de cronista oficial de Cee poderá concederse a aquelas persoas físicas que acreditaran un profundo coñecemento do pasado histórico de Cee mediante publicacións científicas e actividades culturais relevantes.

2. A proposta de iniciación do expediente debera acompañarse dunha memoria na que se especifiquen os méritos que concorran na persoa que se propón, xunto cunha recensión biográfica e bibliográfica.

3. A aprobación da concesión desta distinción requirirá acordo plenario adoptado pola maioría absoluta do número legal de membros da Corporación.

4. Esta distinción correspóndese coa imposición dun pin de solapa co escudo do Concello de Cee e un diploma artístico co escudo de Cee no que constará unha breve mención dos merecementos, e levarase a cabo nun acto solemne, procurando que coincida coa data do Día de Galicia ou das Letras Galegas.

Artigo 9 bis. Alcaldesa – Perpetua do Concello de Cee

1. O título de Alcaldesa Perpetua outorgarase de maneira única e excepcional á Patroa da Vila, que o é desde tempos inmemoriais, a Virxe da Xunqueira.

2. A proposta de iniciación do expediente deberá acompañarse dunha memoria técnica xustificativa.

3. A aprobación da concesión desta distinción requirirá acordo plenario adoptado pola maioría absoluta do número legal de membros da Corporación.

4. A entrega do título de Alcaldesa Perpetua, cun diploma artístico co escudo de Cee no que constará unha breve mención dos merecementos, terá lugar nun dos días do novenario na honra da Virxe da Xunqueira, entregándose tamén a réplica do Bastón de Mando de Alcalde/sa.

Artigo 10. Dedicación/denominación de lugares públicos de Cee

1. Correspóndelle ao Pleno da Corporación, por maioría absoluta do número legal dos seus membros, aprobar a proposta da Alcaldía para outorgar a vías municipais ou a establecementos, centros ou instalacións do Concello de Cee, o nome de persoas físicas, organismos, institucións e entidades que, a xuízo da Corporación, reúnan méritos suficientes, sexa por servizos e actividades especiais realizados a favor da cidade no caso de organismos, institucións e entidades, ou pola súa relevancia indiscutible no ámbito científico, cultural, artístico, deportivo, social etc., no caso de persoas físicas.

2. En casos puntuais, e para evitar prexuízos de indefinición transitoria aos/as residentes das vías municipais incluídas neste suposto, poderá empregarse ata que se denominen definitivamente a identificación alfanumérica.

3. Garantirase a equidade de xénero na denominación das vías municipais e dos establecementos, centros ou instalacións do Concello de Cee outorgadas a persoas físicas, en consonancia co disposto na normativa correspondente.

4. Nas denominacións con nomes comúns, darase preferencia ao uso da toponimia e microtoponimia local, entre as propostas de denominación de lugares públicos de Cee, como mostra do apoio á conservación e posta en valor do seu patrimonio material e inmaterial.

CAPÍTULO III. PROCEDEMENTO PARA A CONCESIÓN DE TÍTULOS, HONRAS E DISTINCIÓNS

Artigo 11. Iniciación e tramitación

1. A concesión da medalla do Concello de Cee, dos títulos de fillo/a predilecto/a, fillo/a adoptivo/a, cronista oficial de Cee, Alcaldesa - Perpetua do Concello de Cee, así como a denominación de vías ou de establecementos, centros e instalacións municipais, a instalación de placas ou elementos análogos, e o irmandamento con outras cidades a que se refire este regulamento, requirirá a instrución previa do oportuno expediente que servirá para determinar os méritos ou circunstancias que aconsellen a concesión e rexerese por este regulamento, con aplicación supletoria do Regulamento de organización, funcionamento e réxime xurídico das entidades locais (R.D. 2568/1986, do 28 de novembro) ou a disposición que se é o caso o substitúa.

2. Calquera persoa, entidade ou asociación poderá facer propostas mediante escrito presentado no Rexistro Xeral do Concello ou a través da sede electrónica, ou por calquera dos medios indicados no artigo 16.4 da Lei 39/2015, dirixido ao/a alcalde ou alcaldesa.

3. Os anteditos procedementos iniciaranse mediante providencia da Alcaldía, ou por requirimento dunha terceira parte dos membros que integran a Corporación, para a concesión da medalla de Cee e dos títulos de fillo/a predilecto/a, fillo/a adoptivo/a, cronista oficial de Cee, así como para as propostas de denominación de espazos públicos e irmandamentos.

CAPÍTULO IV. LOITO OFICIAL NO CONCELLO DE CEE

Artigo 12. O loito oficial

1. O alcalde ou alcaldesa poderá acordar mediante decreto da alcaldía a declaración de loito oficial cando circunstancias ou feitos de especial transcendencia así o requiran.

2. No decreto da Alcaldía incluíranse todas e cada unha das accións que se vaian desenvolver en sinal de respecto e condolencia.

3. No casos en que a declaración de loito oficial veña acordada por outras institucións ou administracións públicas de ámbito internacional, comunitario, estatal ou autonómico, estarase ao preceptuado pola correspondente declaración.

CAPÍTULO V. IRMANDAMENTO

Artigo 13. Obxecto, requisitos e procedemento

1. O Concello de Cee poderá decidir o irmandamento con outros municipios, cidades ou localidades co fin de desenvolver vínculos de amizade. É o nivel máis elevado que pode alcanzar a cooperación con outras cidades ou colectividades análogas. Estará baseado na existencia de valores compartidos, vínculos históricos, culturais, lingüísticos, económicos e similares capaces de xerar unha relación permanente entre elas.

2. Os irmandamentos poderán celebrarse con cidades españolas, europeas ou de calquera outro estado recoñecido por España. Non se celebrarán con cidades que pertencen a estados cuxos sistemas políticos non respecten os principios de democracia e os dereitos humanos ou nos que se practique calquera tipo de discriminación incompatible cos valores democráticos, salvo que o seu obxecto específico e preferente de superar esa situación e apoiar a recuperación das liberdades estea debidamente xustificado no expediente.

3. Os obxectivos perseguidos poderán ser:

a) Favorecer a creación de sentimentos de proximidade entre a cidadanía, promovendo o mantemento de relacións pacíficas entre os pobos, a resolución de conflitos pola vía do diálogo, a cooperación e o dereito, a tolerancia entre as diversas culturas e civilizacións e, en xeral, os valores establecidos na Carta das Nacións Unidas.

b) Fomentar a aproximación da poboación, o incremento do turismo, os intercambios educativos, tecnolóxicos e culturais, e a solidariedade coas situacións de crise ou necesidade.

c) Estimular a realización de proxectos que supoñan o intercambio de coñecementos, tecnoloxías, arte e cultura.

d) Crear redes de cooperación coas cidades irmandadas para o desenvolvemento de boas prácticas, o intercambio de experiencias e a análise e proposta de solucións en temas concretos de interese común.

e) En xeral, calquera outro obxectivo de interese común que contribúa ao establecemento de vínculos de amizade e colaboración para fins pacíficos e de superación dos obstáculos ao respecto e a tolerancia das diferenzas entre os pobos, culturas ou civilizacións.

4. Iniciarase o procedemento de acordo co artigo 11 deste regulamento. Do mesmo xeito, a proposta poderá proceder da cidade que pretende o irmandamento con Cee.

5. O expediente será instruído polo departamento municipal que corresponda segundo os casos, para o que se redactará un informe sobre os vínculos existentes, os obxectivos e as posibilidades de financiamento dos gastos. Terá que quedar reflectida a conformidade do órgano de goberno da cidade coa que se pretende celebrar o irmandamento.

A adopción do acordo de irmandamento requirirá para a súa aprobación acordo adoptado pola maioría absoluta do número legal de membros da Corporación.

6. Salvo que se trate dunha cidade española, a intención de celebrar o irmandamento comunicárase ao Ministerio competente en materia de administracións públicas e ao Ministerio de Asuntos Exteriores para os efectos oportunos.

7. Cumpridos os requisitos anteriores, procederase de xeito conxunto á redacción dun proxecto de protocolo de irmandamento.

8. O protocolo de irmandamento conterá, ademais das mencións xerais de lugar, data, persoas que interveñen e carácter co que actúan, as finalidades e obxectivos que pretenden alcanzar.

DISPOSICIÓN ADICIONAL PRIMEIRA

Mantéñense vixentes a todos os efectos os títulos, honras e distincións outorgados polo Concello con anterioridade a entrada en vigor deste regulamento.

DISPOSICIÓN ADICIONAL SEGUNDA.

O presente regulamento permanecerá vixente en tanto non se acorde a súa modificación ou derogación expresa

DISPOSICIÓN DEREGATORIA

O presente Regulamento derroga aqueles outros e disposicións que o contradigan.

DISPOSICIÓN FINAL

O presente regulamento entrará en vigor tras a súa aprobación definitiva, unha vez publicado integramente no BOP e transcorrido o prazo a que se refire o artigo 65.2 da Lei 7/1985, de 2 abril, reguladora das bases do réxime local.”

En Cee, o 29 de maio de 2025.

Alcaldesa do Concello de Cee

Margarita Lamela Louzán

2025/3517